

**SPORTSKI SAVEZ OPĆINE
BOSANSKA KRUPA**

S T A T U T

Bos. Krupa, juni 2012.godine

Na osnovu člana 14. Zakona o udruženjima i fondacijama («Službene novine FBiH», broj 45/02), i člana 61. Zakona o sportu USK-a ("Službeni glasnik US Kantona" broj; 15/10), Skupština Sportskog saveza općine Bosanska Krupa, na sjednici održanoj dana 25.06.2012. godine, donosi

S T A T U T SPORTSKOG SAVEZA OPĆINE BOS. KRUPA

I – OPĆE ODREDBE

Član 1.

Sportski savez općine Bosanska Krupa (u daljem tekstu: Savez) je nevladina i neprofitna organizacija za razvoj sporta u općini Bos. Krupa, kojeg čine sportske organizacije i udruženja na području općine Bos. Krupa, kao članice Saveza.

Član 2.

Ovim statutom utvrđuju se pitanja od značaja za ostvarivanje ciljeva i obavljanje djelatnosti Saveza, i to:

1. naziv i sjedište Saveza;
2. ciljevi i djelatnosti Saveza;
3. zastupanje i predstavljanje Saveza;
4. organi Saveza;
5. pečat i znak Saveza;
6. sticanje i raspolaganje imovinom;
7. način donošenja Programa rada, Finansijskog plana, Izvještaja o radu i Finansijskog izvještaja;
8. postupak za donošenje statuta, izmjena i dopuna statuta i drugih općih akata Saveza;
9. uvjeti i način učlanjenja, prestanak članstva, kao i prava, dužnosti i odgovornosti članova Saveza, uvjeti i postupak za pripajanje, razdvajanje ili prestanak rada Saveza;
10. druga pitanja od značaja za djelovanje Saveza.

II – NAZIV I SJEDIŠTE SAVEZA

Član 3.

Naziv Saveza je Sportski savez općine Bosanska Krupa.
Sjedište Saveza je u Bosanskoj Krupi, ulica 511. Slavne brdske brigade bb.

III – DJELATNOST SPORTSKOG SAVEZA

Član 4.

Sportske asocijacije (društva, klubovi i udruženja) koje djeluju i rade na području općine Bos. Krupa, udružili su se u Sportski savez radi usklađivanja i ostvarivanja svojih zajedničkih ciljeva, potreba i interesa. U tom cilju Sportski savez kao sportsko udruženje planiraće i realizovati sljedeće djelatnosti: a koji se odnose na:

- planiranje i programiranje strategije razvoja u oblasti sporta na području općine Bosanska Krupa i šire zajednice,
- stvaranje uslova za organizovanje, provođenje i razvoj istematske sportske aktivnosti građana, djece i omladine u oblasti sportske rekreacije, školskog , invalidnog i takmičarskog sporta u općini i šire;
- dogovaranje i utvrđivanje zajedničkih interesa u pogledu korištenja sportskih objekata, zaštite sportista, usavršavanje stručnih kadrova te sistema sportskih takmičenja i sl.
- izgrađivanje prijedloga, stavova i mišljenja po pitanjima od zajedničkog interesa prema organima vlasti,

- predstavljanje i zastupanje kod organa vlasti općine Bos. Krupa i USK-a,
- organizovanje sportskog marketinga, propagande i informativne djelatnosti u vezi programa dopunskih djelatnosti,
- dosljedno reprezentovanje općine, kantona i države BiH u zemlji i inostranstvu,
- realizovanje posebno izraženog zajedničkog društvenog interesa u oblasti sporta,
- unapređenje kvaliteta, podizanju i usavršavanju mladih talenata i talentovanih sportista svih uzrasta, u cilju razvoja vrhunskog sporta,
- realizovanje informativnog sistema o sportu i sportskim organizacijama i
- obavljanje i drugih poslova i zadataka u oblasti sporta.

U okviru Sportskog saveza mogu se utvrditi i drugi zajednički ciljevi, poslovi i zadaci za čije ostvarenje iskažu interes udružene članice.

Član 5.

Sportski savez osim svoje redovne djelatnosti sadržane u članu 4. ovog Statuta može obavljati i druge dopunske djelatnosti koje se odnose na: promet roba i usluga, ugostiteljsku i izdavačku djelatnost, organizovanje igara na sreću, odnosno osnovati pravno lice za obavljanje privredne i uslužne djelatnosti pod uvjetima utvrđenim zakonom.

IV – OSNOVNI PRINCIPI U SPORTU

Član 6.

Osnovni principi na kojima se organizira sport u općini Bosanska Krupa su:

- prava i slobode sportista,
- afirmacija duha olimpizma,
- pravo svih građana da se bave sportom pod jednakim uvjetima bez obzira na nacionalnu, vjersku, političku, rasnu, socijalnu i spolnu pripadnost,
- ostvarivanje javnog interesa Općine u ovoj oblasti i obaveza općinskih organa da materijalnom podrškom i programima razvoja stvaraju opće i posebne uvjete za sportske aktivnosti, sportsko napredovanje i usavršavanje, materijalnu i društvenu stimulaciju za ostvarivanje vrhunskih rezultata,
- osiguravanje zdravstvene zaštite sportista i sprečavanja upotrebe nedozvoljenih stimulativnih sredstava,
- stručnost u radu i podsticanje naučno istraživačkog rada primjenom savremenih metoda rada, informatike i izdavačke djelatnosti,
- pravilo da se svi sporovi između sportista, sportskih organizacija i organa rješavaju isključivo putem odgovarajućih sportskih organa i arbitražnih sportskih tijela,
- autonomnost sportskih organizacija u pogledu uređivanja unutrašnjih odnosa i udruživanja.

IV – JAVNI INTERES I CILJEVI U SPORTU

1. Javni interes

Član 7.

Javni interesi i ciljevi Saveza su:

- razvijanje svijesti građana, posebno mladih, o sportu i njegovim vrijednostima,
- doprinos vaspitanju, obrazovanju i razvoju djece i omladine,
- podsticanje i afirmiranje sporta i njegovih vrijednosti kao dijela kulture i ukupnih materijalnih i duhovnih vrijednosti društva,
- očuvanje zdravlja kao osnove svake ljudske aktivnosti, radne produktivnosti, izražavanja stvaralaštva i humanog življenja,
- podsticanje sistematskog i organiziranog bavljenja sportom u slobodno vrijeme,
- sistematsko stvaranje uvjeta za ostvarivanje visokih sportskih rezultata,
- organizacija sistema takmičenja u skladu sa pravilima međunarodnih sportskih federacija,

- školski i studentski sport i sport osoba sa invaliditetom.

2. Strategija razvoja sporta

Član 8.

- (1) Radi ostvarivanja javnog interesa i ciljeva u sportu, utvrđuje se Strategija razvoja sporta u Općini Bos. Krupa (u daljnjem tekstu: Strategija).
- (2) Strategija se donosi najmanje za četiri godine (Olimpijski ciklus).
- (3) Na osnovu Strategije, donose se programi razvoja sporta.
- (4) Strategija razvoja sporta u Općini usaglašava se sa Strategijom razvoja sporta u USK-u.

3. Sadržaj Strategije

Član 9.

Strategijom se utvrđuju :

- osnovna polazišta i pravci razvoja,
- sadržaj i obim sportskih djelatnosti koje se finansiraju, odnosno sufinansiraju iz budžeta Općine Bosanska Krupa,
- razvojni i stručni zadaci u sportu,
- okvirni kriteriji za vrednovanja programa i njihovog finansiranja u sportu,
- nosioci razvoja i mjere kontrole njegove realizacije.

Strategiju i Program razvoja sporta u Općini Bosanska Krupa usvaja Općinsko vijeće, na prijedlog Skupštine Sportskog saveza općine Bos. Krupa.

V - ZASTUPANJE I PREDSTAVLJANJE SAVEZA

Član 10.

Savez zastupaju i predstavljaju predsjednik Upravnog odbora Saveza i sekretar Saveza.

U poslovima zastupanja i predstavljanja Saveza predsjednik Upravnog odbora nastupa i predstavlja se kao predsjednik Saveza.

VI - ORGANI SAVEZA

1. Skupština Saveza

Član 11.

Skupštinu Saveza (u daljem tekstu: Skupština) čine ovlaštene predstavnici sportskih i drugih udruženja koji su udruženi u Savez (u daljem tekstu: delegati).

Ukupan broj delegata Skupštine je u ovisnosti od broja članica Saveza, a svaka članica daje po jednog delegata u Skupštinu Saveza.

Broj delegata Skupštine Saveza utvrđuje se za svaki izborni ciklus donošenjem posebne odluke.

Član 12.

Skupština je ovlaštena da:

- 1) donosi statut, izmjene i dopune statuta i druge akte određene statutom;
- 2) daje suglasnost na pravne radnje poduzete u postupku osnivanja Saveza;
- 3) bira i opoziva predsjednika Skupštine;
- 4) bira i opoziva predsjednika i članove Upravnog odbora;
- 5) bira i opoziva predsjednika i članove Nadzornog odbora;
- 6) usvaja izvještaje koje je pripremio Upravni odbor;
- 7) odlučuje o udruživanju u Saveze, pripajanju, razdvajanju, transformaciji, prestanku rada, i drugim statusnim promjenama Saveza;
- 8) donosi Poslovnik o svom radu;
- 9) utvrđuje i usvaja finansijske izvještaje;
- 10) potvrđuje delegiranje predstavnika Saveza u druge Saveze i organizacije;

- 11) utvrđuje osnove strategije i politike sporta općine Bos. Krupa;
- 12) utvrđuje osnove politike međunarodne sportske saradnje;
- 13) daje mišljenje na normative, standarde i kriterije na osnovu kojih se na nivou općine Bos. Krupa vrši raspodjela sredstava za finansiranje sporta;
- 14) vrši nadzor nad namjenskim korištenjem i upravljanjem sredstvima;
- 15) odlučuje o svim pitanjima koja nisu u nadležnosti drugog organa Saveza;
- 16) bira jednog člana Saveza u Vijeće za sport USK-a.

Član 13.

Redovna Skupština se održava najmanje jednom godišnje, po pravilu početkom godine, a najkasnije do kraja maja tekuće godine.

Po potrebi, mogu se održavati i vanredne i svečane skupštine.

2. Predsjednik Skupštine

Član 14.

Skupštinu saziva i njenim radom rukovodi predsjednik Skupštine.

Predsjednik Skupštine se bira iz reda delegata Skupštine.

Mandat predsjednika traje 4 godine i može biti ponovo biran na tu dužnost.

Član 15.

Na inicijativu Upravnog odbora ili najmanje jedne trećine svih delegata Skupštine predsjednik Skupštine dužan je sazvati Skupštinu.

Za održavanje i punopravno odlučivanje Skupštine potrebno je prisustvo najmanje za jedan preko polovine svih delegata Skupštine, koji čine kvorum Skupštine.

Skupština donosi sve odluke natpolovičnom većinom glasova delegata Skupštine prisutnih na Skupštini, osim donošenja statuta, izmjena i dopuna statuta, izbora i opoziva predsjednika Skupštine, te predsjednika i članova Upravnog odbora, o kojim pitanjima Skupština donosi odluke dvotrećinskom većinom svih delegata Skupštine.

Član 16.

Ostala pitanja u vezi sa načinom rada i odlučivanja Skupštine uređuju se Poslovníkom o radu Skupštine.

Član 17.

Mandat delegata u Skupštini je četiri godine, uz mogućnost ponovnog delegiranja.

Ukoliko delegat Skupštine iz bilo kojeg razloga prestane sa vršenjem funkcije delegata Skupštine, članica Saveza koja ga je imenovala za delegata, na njegovo mjesto imenuje drugog delegata koji nastavlja mandat prethodnog delegata.

3. Upravni odbor

Član 18.

Upravni odbor ima 11 članova, od kojih je jedan predsjednik Upravnog odbora.

a) U Upravni odbor se bira po jedan član iz sljedećih grupacija sportova:

- Školski sport - Društvo pedagoga tjelesne kulture osnovnih i srednjih škola općine Bos. Krupa,
- Sport osoba sa invaliditetom - "SSRI -511" Bos. Krupa,
- Sportovi na vodi, pod vodom i sportski ribolov,
- Sportovi sportske rekreacije (planinarstvo, ekstremni sportovi - biciklizam, aerobik i auto-moto sport),
- Ostali sportovi (šah, šešbeš-tavla i sportske škole).

b) U Upravni odbor se biraju po dva člana iz sljedećih grupacija sportova:

- Iz nogometnog sporta (NK "Bratstvo", NK "Sloga 1922", NK "Željezničar 73", OŠN "Sloga" i ŽNK "Željezničar 2011"),
- Iz loptačkih dvoranskih sportova (Košarkaški klub "Bratstvo", Odbojkaški klub "Una",

- Odbojkaški klub "Krušnica" i Teniski klub "BK Tens"),
- Iz borilačkih sportova (Karate klub "Feniks", Karate klub "Una", Kick boxing klub "Otoka" i Klub borilačkih vještina "Borac").

Predsjednik i članovi Upravnog odbora biraju se na period od četiri godine, a nakon isteka mandata mogu biti ponovo birani.

Član Upravnog odbora koji dobije najveći broj glasova od članova Skupštine je predsjednik Upravnog odbora i predsjednik Saveza. U slučaju istog broja glasova, odlučuje glas predsjednika Skupštine.

Predsjednik Upravnog odbora Saveza je po funkciji Predsjednik Sportskog saveza općine Bos. Krupa.

Član 19.

Upravni odbor ovlašten je da:

- 1) priprema sjednice Skupštine;
- 2) priprema i predlaže izmjene i dopune statuta i drugih akata koje donosi Skupština;
- 3) provodi politiku, zaključke i odluke Skupštine;
- 4) odlučuje o pribavljanju sredstava, pokretne i nepokretne imovine u korist i za račun Saveza, kao i o raspolaganju sa tom imovinom, u skladu sa zakonom i ovim statutom;
- 5) brine o obezbjeđivanju sredstava i drugih uvjeta za rad Saveza;
- 6) upravlja imovinom Saveza s pažnjom dobrog domaćina;
- 7) donosi Pravilnik o raspodjeli sredstava iz budžeta Općine;
- 8) donosi programe rada i finansijske planove Saveza, razmatra i usvaja periodične obračune, utvrđuje prijedlog godišnjeg obračuna i podnosi ga Skupštini na usvajanje;
- 9) podnosi godišnje izvještaje o svom radu Skupštini na usvajanje;
- 10) imenuje sekretara Saveza;
- 11) imenuje stalna i povremena radna tijela Saveza (komisije, odbori, i sl.);
- 12) donosi pravilnike i druge opće i pojedinačne akte, u skladu sa ovim statutom;
- 13) odlučuje o prijemu u članstvo Saveza i prestanku članstva u Savezu;
- 14) odlučuje o zaključivanju ugovora, sporazuma i drugih akata sa trećim osobama;
- 15) odlučuje o osnivanju subjekata za privrednu i drugu djelatnost, pod uvjetima utvrđenim zakonom i ovim statutom;
- 16) donosi odluku o dodjeli priznanja, pohvala i nagrada Saveza;
- 17) predlaže dodjelu javnih priznanja, pohvala i nagrada drugim institucijama, u skladu sa zakonom i aktima Saveza;
- 18) odlučuje o službenim putovanjima u inozemstvo;
- 19) odlučuje o potrebi zapošljavanja i drugog angažiranja stručnog i administrativnog osoblja za potrebe Saveza (Stručna služba);
- 20) brine se i odlučuje o izvršavanju zadataka koji se odnose na finansijsko poslovanje Saveza, u skladu sa zakonom;
- 21) vrši i druge poslove u skladu sa zakonom, ovim statutom i odlukama Skupštine;
- 22) predlaže Skupštini jednog člana Saveza za imenovanje u Vijeće za sport USK-a.

Član 20.

Članovi Upravnog odbora imaju pravo na naknadu za rad u Upravnom odboru, kao i pravo na naknadu troškova u vezi prisustva sjednicama Upravnog odbora, u visini koju svojom odlukom određuje Upravni odbor.

Član Upravnog odbora ne može biti član Skupštine.

Ostala pitanja koja se odnose na način rada i odlučivanja Upravnog odbora utvrđuju se Poslovníkom o radu Upravnog odbora.

4. Nadzorni odbor

Član 21.

Nadzorni odbor vrši nadzor nad zakonitošću rada i finansijskog poslovanja Saveza.

Nadzorni odbor ima tri člana, koje imenuje Skupština Saveza.
Članovi Nadzornog odbora između sebe predlažu i biraju predsjednika Nadzornog odbora.
Mandat članova Nadzornog odbora je četiri godine, a po isteku mandata mogu biti ponovo birani.

Članovi Nadzornog odbora ne mogu istovremeno biti i delegati u Skupštini Saveza.

Nadzorni odbor razmatra godišnje izvještaje o radu Saveza, te vrši druga ovlaštenja u skladu sa zakonom i ovim Statutom.

Nadzorni odbor podnosi Skupštini Saveza izvještaj o svom radu, najmanje jednom godišnje.

Nadzorni odbor za vršenje poslova, odnosno ovlaštenja iz svoje nadležnosti može po potrebi angažirati specijalizirane institucije i stručne osobe, ako je to neophodno za razrješenje složenijih pitanja u vezi rada Saveza.

Članovi Nadzornog odbora imaju pravo na naknadu za rad u Nadzornom odboru, kao i na naknadu troškova nastalih u vezi sa radom u Nadzornom odboru, u visini koju odlukom utvrđuje Upravni odbor.

5. Sekretar Saveza

Član 22.

Sekretar Saveza je osoba koja za vršenje poslova radnog mjesta sekretara Saveza zasniva radni odnos na neodređeno vrijeme, zaključenjem ugovora o radu, u skladu sa zakonom.

Prava i obaveze sekretara Saveza utvrđuju se ovim statutom, Ugovorom o radu i Pravilnikom o radu.

Na druga prava i obaveze sekretara Saveza primjenjuju se odredbe zakona i drugih propisa iz oblasti rada, kao i opća i pojedinačna akta organa Saveza.

Član 23.

Sekretar Saveza:

- 1) u odsutnosti ili spriječenosti predsjednika Upravnog odbora, odnosno predsjednika Saveza, zastupa i predstavlja Savez;
- 2) rukovodi radom stručne službe (ukoliko je obrazovana);
- 3) lično obavlja i brine se o obavljanju administrativno-tehničkih i finansijskih poslova za potrebe Saveza;
- 4) pruža predsjedniku Saveza neophodnu pomoć u obavljanju poslova iz njegove nadležnosti;
- 5) vodi sve potrebne evidencije vezano za rad Saveza;
- 6) učestvuje u pripremanju sjednica Upravnog odbora i Skupština Saveza;
- 7) učestvuje u radu Upravnog odbora, bez prava odlučivanja;
- 8) obavlja i druge poslove iz djelokruga rada Saveza, po odlukama Skupštine i Upravnog odbora, te po uputama i nalogima predsjednika Upravnog odbora.

Član 24.

Za potrebe organa Saveza i udruženih članica može se obrazovati jedinstvena stručna služba za obavljanje stručnih, računovodstvenih i administrativno-tehničkih poslova.

Stručna služba iz stava 1. ovog člana, na prijedlog Upravnog odbora, obrazuje se odlukom Skupštine.

Član 25.

Ostala pitanja koja se odnose na unutrašnju organizaciju i djelokrug stručne službe, imenovanje i smjenjivanje, djelokrug poslova, prava i odgovornosti sekretara, utvrđuju se Pravilnikom o unutrašnjoj organizaciji i Pravilnikom o radnim odnosima Saveza.

Pravilnike iz stava 1. ovog člana donosi Upravni odbor.

6. Komisije Saveza

Član 26.

Radi razmatranja i proučavanja određenih pitanja i realiziranja poslova i zadataka, Upravni odbor može obrazovati stalne i povremene komisije i druga radna tijela, a naročito:

- Komisiju za vrhunski, kvalitetni i omladinski sport- stalna komisija;
- Statutarno-pravna- stalna komisija;
- Finansijska komisija-stalna komisija;
- Komisiju za sportsku rekreaciju i tradicionalne sportske manifestacije;
- Komisiju za Izbor sportiste godine;
- Komisiju za sportsku infrastrukturu i sportske objekte.

Bliža pitanja o obrazovanju i radu komisija uređuju se Poslovníkom o radu komisija.

VII – PEČAT I ZNAK SAVEZA

Član 27.

Pečat Saveza je okruglog oblika, prečnika 30 mm, sa tekstom ispisanim po obodu pečata, a koji sadrži naziv i sjedište Saveza.

U sredinu pečata je znak Saveza.

Znak saveza čini grb Općine Bosanska Krupa, što simbolizira jedinstvo sporta u općini i šire..

Član 28.

U slučaju korištenja, upotrebe ili isticanja znaka Saveza, iznad znaka ispisuju se riječi: "Sportski savez općine", a ispod znaka riječi: "Bosanska Krupa".

VIII – STICANJE I RASPOLAGANJE IMOVINOM

Član 29.

Imovinu Saveza čine :

- sredstva dobijena iz budžeta,
- članarina,
- dobrovoljni priloz i pokloni fizičkih i pravnih lica,
- prihodi od kamata, dividendi, dobiti od kapitala, zakupnine, honorara i sličnih izvora pasivnih prihoda,
- prihodi stečeni obavljanjem privredne djelatnosti,
- drugi prihodi stečeni u skladu sa Zakonom i Statutom.

Član 30.

Korištenje i raspolaganje sredstvima Saveza vrši se na osnovu Finansijskog plana, u skladu sa Programom rada, a primjenom propisa o finansijskom poslovanju i odluka Skupštine i Upravnog odbora, vodeći računa da se sredstva koriste u svrhu ostvarivanja ciljeva i djelatnosti Saveza.

Za izvršenje Finansijskog plana odgovorni su predsjednik Upravnog odbora i sekretar Saveza.

IX – FINANSIJSKI IZVJEŠTAJ I IZVJEŠTAJ O RADU

Član 31.

Finansijski izvještaj i Izvještaj o radu Saveza, na prijedlog Finansijske komisije utvrđuje Upravni odbor i podnosi ih Skupštini na usvajanje najmanje jednom godišnje, a po potrebi i periodično, odnosno u rokovima utvrđenim zakonom.

Odluka o usvajanju izvještaja iz stava 1. ovog člana donosi se natpolovičnom većinom prisutnih delegata na Skupštini.

X – STATUT I OPĆI AKTI SAVEZA

Član 32.

Statut Saveza, na prijedlog Statutarno-pravne komisije i Upravnog odbora, donosi Skupština Saveza dvotrećinskom većinom ukupnog broja delegata Skupštine.

Izmjene i dopune Statuta vrše se donošenjem odluke o izmjenama i dopunama Statuta, na način i po postupku iz stava 1. ovog člana.

Izmjene i dopune Statuta vrše se i na inicijativu najmanje jedne trećine delegata Skupštine.

Član 33.

Prijedlog odluke o izmjenama i dopunama Statuta utvrđuje Upravni odbor i dostavlja ga u pismenom obliku svim delegatima Skupštine, najmanje 8 dana prije održavanja Skupštine na kojoj će se odlučivati o izmjenama i dopunama Statuta.

Član 34.

Ukoliko je neophodno izvršiti obimnije izmjene i dopune Statuta, može se donijeti novi Statut, čijim stupanjem na snagu prestaje da važi dotadašnji Statut.

Član 35.

Pored Statuta, u Savezu se mogu donositi i druga opća akta Saveza kojima se bliže uređuju pitanja od značaja za rad Saveza, a naročito rad i radni odnosi, unutrašnja organizacija, rad komisija Saveza, finansijsko poslovanje Saveza, disciplinska odgovornost članova Saveza, način i postupak dodjele nagrada i javnih priznanja, i druga pitanja.

Druga opća akta iz stava 1. ovog člana donosi Upravni odbor Saveza.

Član 36.

Skupština Saveza donosi Poslovnik o radu Skupštine, većinom glasova prisutnih delegata Skupštine.

Poslovnik o radu Skupštine sadrži pitanja koja se odnose na rad i odlučivanje Skupštine, a naročito, pripremanje i sazivanje Skupštine, održavanje i rad Skupštine, rukovođenje radom Skupštine, stalna i povremena radna tijela Skupštine, način odlučivanja Skupštine, odnos Skupštine prema nadležnim organima i javnosti, te druga pitanja od značaja za rad Skupštine Saveza.

Član 37.

Upravni odbor Saveza donosi Poslovnik o radu Upravnog odbora.

Poslovnik o radu Upravnog odbora sadrži pitanja koja se odnose na rad i odlučivanje Upravnog odbora, pripremanje i sazivanje sjednica, održavanje sjednice i odlučivanje Upravnog odbora, rukovođenje radom Upravnog odbora, radna tijela Upravnog odbora, odnos Upravnog odbora prema Skupštini i drugim nadležnim tijelima i organima, te druga pitanja od značaja za rad Upravnog odbora.

XI – ČLANSTVO U SAVEZU

1. Uvjeti i način učlanjenja u Savez

Član 38.

Članstvo u Savezu je dobrovoljno i mogu ga steći sportske organizacije (klubovi), odnosno udruženja upisana u registar udruženja u skladu sa zakonom.

O članstvu u Savezu odlučuje Upravni odbor, na temelju pismenog zahtjeva za pristupanje Savezu, uz koji se podnosi rješenje o upisu u registar udruženja, Statut udruženja i identifikacioni broj udruženja.

Na temelju odobrenja Upravnog odbora, nova članica Saveza potpisuje ugovor o pristupanju u Savez.

Ugovorom iz stava 3. ovog člana utvrđuju se međusobna prava i obaveze Saveza i članica Saveza.

2. Prestanak članstva u Savezu

Član 39.

Članstvo u Savezu prestaje dobrovoljnim istupanjem iz Saveza, prestankom svojstva pravnog lica članice, prestankom rada članice i isključivanjem iz Saveza.

Članstvo u Savezu prestaje isključivanjem iz Saveza u slučaju teže kršenja odredaba ugovora o pristupanju u Savez i u slučaju ako članica Saveza poduzima radnje i postupke koji su u suprotnosti sa ciljevima i djelatnostima Saveza ili nanose štetu ugledu Saveza.

Odluku o isključivanju iz članstva Saveza donosi Upravni odbor, a po žalbi protiv odluke o isključenju iz Saveza odlučuje Skupština Saveza.

Ostala pitanja koja se odnose na prestanak članstva isključivanjem iz Saveza, uređuju se Pravilnikom o disciplinskoj odgovornosti.

3. Prava, dužnosti i odgovornosti članica Saveza

Član 40.

Članice Saveza imaju prava i dužnosti da:

- aktivno učestvuju u ostvarivanju ciljeva Saveza i vršenju djelatnosti Saveza;
- biraju, odnosno predlažu svoje predstavnike u organe i tijela Saveza;
- preko svojih predstavnika aktivno učestvuju u radu i odlučivanju u organima i tijelima Saveza;
- ostvaruju određena finansijska sredstva iz sredstava koja obezbjeđuje Savez, prema kriterijima utvrđenim općim aktom Saveza i raspoloživim sredstvima;
- udružuju određena finansijska sredstva za finansiranje zajedničkih funkcija Saveza, u skladu sa ugovorom iz člana 38. stav 4. ovog statuta;
- izvršavaju druga prava i obaveze utvrđene ovim Statutom i drugim općim aktima Saveza i odlukama Skupštine Saveza.

Član 41.

Nepoštivanjem odredaba ovog Statuta, drugih općih akata, odluka organa Saveza i ugovora iz člana 38. stav 4. ovog Statuta, članice Saveza čine povrede discipline za koje im se može izreći kazna, u skladu sa Pravilnikom o disciplinskoj odgovornosti.

XII – PRIPAJANJE, RAZDVAJANJE, TRANSFORMACIJA I PRESTANAK RADA SAVEZA

Član 42.

Savez je članica Sportskog saveza Unsko-sanskog kantona. Savez se može transformirati, u skladu sa zakonom, o čemu odluku donosi Skupština Saveza, dvotrećinskom većinom glasova svih članova Skupštine.

Član 43.

Savez prestaje s radom:

- ako Skupština Saveza, iz opravdanih razloga, donese odluku o prestanku rada Saveza, ili promjeni – transformira Savez, na način i po postupku utvrđenim u članu 42. stav 2. ovog statuta;
- ako je Savez prestao djelovati, odnosno ako je proteklo 2 godine od dana održavanja Skupštine, a nova Skupština nije održana ili ako se smanji broj članica Saveza ispod tri, a Skupština u roku od tri mjeseca od dana nastupanja ove okolnosti ne donese odluku o prijemu novih članica;
- u drugim slučajevima utvrđenim zakonom.

XIII – RASPODJELA PREOSTALE IMOVINE U SLUČAJU PRESTANKA RADA SAVEZA

Član 44.

U slučaju prestanka rada Saveza u skladu sa zakonom i ovim Statutom, iz preostalih novčanih sredstava podmiruju se dugovi prema povjeriocima, dugovanja prema zaposlenicima Saveza po osnovu prava iz radnog odnosa, eventualna dugovanja prema osnivačima Saveza i druga dugovanja.

Preostala novčana sredstva, pokretna i nepokretna imovina Saveza, ustupa se na korištenje općini Bos. Krupa, ili drugom udruženju iste ili slične djelatnosti iz oblasti sporta, na način i pod uslovima utvrđenim zakonom.

Član 45.

Sve odluke o raspodjeli preostale imovine u slučaju prestanka rada Saveza, na prijedlog Upravnog odbora, donosi Skupština Saveza dvotrećinskom većinom glasova svih članova Skupštine.

XIV – PRELAZNE I ZAVRŠNE ODREDBE

Član 46.

Opća akta iz ovog Statuta koja su neophodna za rad Saveza, Upravni odbor će donijeti u roku od tri mjeseca od dana stupanja na snagu ovog Statuta, a ostala opća akta po potrebi.

Član 47.

Stupanjem na snagu ovog Statuta prestaje da važi Statut Sportskog saveza općine Bos. Krupa od 20.12.2002. godine, broj:01-62/02, kao i sve usvojene odluke o izmjenama i dopunama Statuta Saveza koje su donijete u periodu od 2002. do 2011. godine.

Član 48.

Ovaj Statut stupa na snagu danom donošenja.

Broj: 01-158/12
Bos. Krupa, 25.06.2012.g.

Predsjednik Skupštine,
mr. Suljo Suljić, dipl.ecc.